

दिनांक : 13.05.2026

समय : 18.45 बजे

- केन्द्रीय मंत्रिमंडल खरीफ विपणन सीजन 2026-27 सारू 14 साखां रा सरकारी मोल मांय बधोतरी री मंजूरी दीनीं
- सी.बी.एस.ई. 12वीं कक्षा रा इम्तिहान रो नतीजो जारी कीनो-लड़कियां बाजी मारीं
- मुख्यमंत्री भजनलाल शर्मा कह्यो -यमुना नदी रो पाणी पाइप लेण रे जरिए राजस्थान लावण री मियाद तैय करी ज्यीं
- प्रदेश रा आतूणी अर लंकाऊ-ऊगणी हलकां मांय ज़बरदस्त गर्मी -फलौदी अर जैसलमेर मांय पारो 46 डिग्री सेल्सियस रे पार पूग्यो

000

केन्द्रीय मंत्रिमंडल विपणन सीजन 2026-27 सारू खरीफ री 14 साखां रा सरकारी मोल मांय बधोतरी री मंजूरी दे दीनी हैं सूचना अर प्रसारण मंत्री अश्विनी वैष्णव आज नई दिल्ली मांय आ जाणकारी दीनीं वे बतायो के मौजूदा खरीफ सीजन सारू किसानां ने करीब दो लाख साठ हजार करोड रुपया रो चुकारो कर्यो जावेलां

.....

श्री वैष्णव बतायो के सब ऊं बत्ती 622 रुपया प्रति क्विंटल री बधोतरी सूरजमुखी रा बीजां सारू करी ज्यी हैं ई सागे ई कपास रा दाम मांय 557 रुपया अर तिल्ली रा मोल मांय 500 रुपया प्रति क्विंटल री बधोतरी करण रो फैसलो करी ज्यो ई फैसला पाछे ग्रेड-ए धान रो मोल दो हजार 461 रुपया, हाइब्रिड ज्वार रो मोल चार हजार 23 रुपया अर बाजरा रो मोल 2 हजार 900 रुपया प्रति क्विंटल व्हेलां तुअर री दाल रो सरकारी मोल आठ हजार 450 रुपया प्रति क्विंटल तय करी ज्यो हैं श्री वैष्णव बतायो के ई सीजन मांय सरकार कानी ऊं 824 लाख मीट्रिक टन ऊं बत्ती साखां री खरीदी रो अनुमान हैं केन्द्रीय मंत्रिमंडल साढे 37 हजार करोड रुपया रा खर्च ऊं कोयला अर लिग्नाइट गैसीकरण परियोजनावां सारू खास योजना ने ई मंजूरी दीनीं

000

केन्द्रीय माध्यमिक शिक्षा बोर्ड-सीबीएसई बारहवीं कक्षा री परीक्षा रा नतीजा रो आज ऐलाण कर दीनो ओ इम्तिहान देवण वाळां मांय ऊं 85 दशमलव दो-शून्य फीसदी पास व्हे ग्यां इम्तिहान मांय लड़कियां रो नतीजो 88 दशमलव आठ-छह फीसदी, जदके लड़कां रो नतीजो 82 दशमलव एक-तीन फीसदी रह्यो बोर्ड रे मुजब विज्ञान, वाणिज्य अर कला संकाय मांय लीरीजी परीक्षा मांय 17 लाख 68 हजार ऊं बत्ता विद्यार्थी शामिल व्हा, ज्यां मांय ऊं 15 लाख 7 हजार ऊं बत्ता पास व्हे ग्यां अजमेर रीजन ऊं इम्तिहान देवण वाळां मांय ऊं 86 दशमलव सात-आठ फीसदी पास व्हे ग्यां अजमेर रीजन मांय इम्तिहान देवण वाळां 88 हजार 118 विद्यार्थियां मांय ऊं 76 हजार 469 पास व्हे ग्या, हालांकि अजमेर रीजन मांय लारला साल री तुलना मांय ई साल पास व्हेवण वाळां रो प्रतिशत कम रह्यो

000

राजस्थान कर्मचारी चयन बोर्ड आवता दिनां ली जावण वाळी न्यारी-न्यारी भर्ती परीक्षावां रो नुवो कार्यक्रम जारी कीनो हैं ई रे मुजब वनपाल सीधी भर्ती परीक्षा-2026 28 जून ने व्हेला, जदके सैकण्ड ग्रेड क्लर्क अर जूनियर असिस्टेंट भर्ती परीक्षा-2025 5 जुलाई ने ली जावेलां पर्यवेक्षक महिला सीधी भर्ती परीक्षा-2026 24 जुलाई ने व्हेलां

000

राज्य पुलिस रो स्पेशल ऑपरेशन ग्रुप-एस.ओ.जी. प्राध्यापक भर्ती परीक्षा-2022 मांय फर्जीवाडो करण अर रिकॉर्ड मांय हेराफेरी करण रा आरोप मांय दो जणां ने गिरफ्तार कीना हैं पकड़ी ज्या आरोपितां मांय राजेश कुमार अर राजस्थान लोक सेवा आयोग-अजमेर रो कर्मचारी मान सिंह शामिल हैं जांच रे दौरान राजेश कानी ऊं वां री ठौड़ दूजा ने बिठा र परीक्षा पास कर र नौकरी हासिल करण री ठा पड़ीं ई पाछे वां कानी ऊं आर.पी.एस.सी. रा रिकॉर्ड मांय फोटो बदली करण सारू मानसिंह ऊं आठ लाख रुपया मांय सौदो करण री ठा पड़ीं एस.ओ.जी. आरोपित राजेश कुमार ने 18 मई ताई रिमांड माथे ले लीनो हैं

000

राज्यपाल अर विश्वविद्यालयां रा कुलाधिपति हरिभाऊ बागड़े कहयो है के खेती-बाडी ऊं जुडी भणार्ई-लिखाई रे ज़रिए देश मांय खाद्य सुरक्षा तैय करी जा सके हैं वे आज कोटा मांय कृषि विश्वविद्यालय रा नौवां दीक्षांत समारोह मांय बोल रह्या हां श्री बागड़े कहयो के किसानां ने उन्नत बीज अर नुवी तकनीक ऊं जोड़ र खुद रे पाण ऊबा कर्या जा सके हैं राज्यपाल नौजवानां ऊं नौकरी करण वाळां री बजाए नौकरी देवण वाळा बणना चाहिजे वे खेती-बाडी मांय ड्रोन, ए-आई अर स्टार्टअप्स काम लेवण सारु कह्यो जळसा मांय कृषि मंत्री डॉ. किरोडी लाल मीणा ई नौजवानां ऊं तालीम ने किसानां अर देश रा भला सारु काम लेवण बाबत् कह्यो दीक्षांत समारोह मांय 358 विद्यार्थियां ने डिग्रियां अर 14 विद्यार्थियां ने सोना रा तमगा दे र नवाजी ज्यां

000

यमुना नदी रा पाणी ऊं जुड्या करार रा बारा मांय राजस्थान अर हरियाणा सरकार बीचे खास सहमति बणी हैं मुख्यमंत्री भजनलाल शर्मा आज नई दिल्ली मांय जलशक्ति मंत्री सी.आर. पाटिल अर हरियाणा रा मुख्यमंत्री नायब सिंह सैनी सागे मीटिंग पाछे आ जाणकारी दीनीं श्री शर्मा कहयो के यमुना नदी रो पाणी पाइप लेण रे जरिए राजस्थान लावण री मियाद तैय कर दीरीजी हैं

.....

मीटिंग पाछे हरियाणा रा मुख्यमंत्री नायब सिंह सैनी बतायो के किशाऊ बांध बण जावण ऊं हरियाणा, राजस्थान अर दिल्ली मांय पाणी री समस्या हमेशा सारु खत्म व्हे जावेलं

000

राज्य सरकार एक जिला-एक उत्पाद नीति रा तैत पांच जिलां सारु 18 करोड़ रुप्या ऊं बत्ता खर्च वाळी परियोजनावां मंजूर कीनी हैं मुख्य सचिव वी. श्रीनिवास री सदरत मांय राख्यी ज्यी मीटिंग मांय दौसा, चूरु, डीडवाना-कुचामन, फलौदी अर बालोतरा मांय आं कामां सारु 10 करोड़ 76 लाख रुप्या जारी करी ज्या हैं ई रा तैत दौसा अर डीडवाना-कुचामन मांय भाटा उद्योग, चूरु मांय लकड़ी ऊं बण्या सामान, फलौदी मांय सोनामुखी भंडारण अर बालोतरा मांय टेक्सटाइल डिजिटल प्रिंटिंग सारु नुवा सेंटर अर लैब खोल्या जावेलं

000

राज्य मांय कानून व्यवस्था मजबूत बणावण अर अपराधियां माथे काबू करण सारु पुलिस मुख्यालय री ओर ऊं दो दिन रो नाकाबंदी अभियान चलायी ज्यो अभियान रा तैत 727 ठौड़ां गाड़ियां री जांच करीजीं अतिरिक्त महानिदेशक वी.के. सिंह बतायो के जांच रे दौरान सात हजार ऊं बत्ता चालान करी ज्यां

000

प्रदेश मांय डिजिटल जनगणना-2027 रा बारा मांय जागरूकता अभियान चलायो जा रहयो हैं भीलवाड़ा जिला मांय ई कलेक्टर, एस.पी., सांसद अर विधायक खुद डिजिटल जनगणना कीनीं शहर मांय न्यारी-न्यारी ठौड़ां हमारी जनगणना-हमारा अधिकार सरीखा नारा वाळा पोस्टर लगा र लोगां ने इण ऊं जुड़बा री सीख दी जा रही हैं झुंझुनू मांय ई आज प्रगणकां सारु खास शिविर लगायी ज्यां

000

प्रदेश रा उतराद-आतूणी अर ऊगणी हलकां मांय जोरदार गर्मी पड़ रही हैं मौसम विभाग रे मुजब आज फलौदी सब ऊं गर्म रह्यो जठे पारो 46 दशमलव 8 डिग्री सेल्सियस दर्ज करी ज्यो जैसलमेर मांय दिन री बगत तापमान 46 दशमलव 1 डिग्री सेल्सियस रिकॉर्ड करी ज्यो बाड़मेर, बीकानेर अर चित्तौड़गढ़ मांय पारो 45 डिग्री सेल्सियस ने पार कर ग्यो जैसलमेर, बाड़मेर, बालोतरा अर बीकानेर मांय लू रा हालात रह्यां राजधानी जयपुर मांय ई लू सरीखा हालात बीचे केई ठौड़ां प्रशासन सड़कां माथे पाणी रो छिडकाव करवायो मौसम विज्ञान केन्द्र जयपुर पाकिस्तान ऊं लाग्योड़ी सरहद कने रा हलकां मांय काल ई जबरदस्त लू बाजण सारु चेतायो हैं ई सागे ई केई जिलां सारु ऑरेंज अर येलो अलर्ट जारी करी ज्यो हैं ई बीचे राज्य रा उतराद-ऊगणी हलकां मांय कठे-कठे आज ई आंधी चाली अर बिरखा व्हीं

000

झुंझुनू जिला मांय मिलावटखोरी रे खिलाफ स्वास्थ्य विभाग री कार्रवाई रे दौरान मोटी तादाद मांय खाण-पीण री चीजां रा नमूना मानक रे मुजब नी मिल्यां मुख्य चिकित्सा अर स्वास्थ्य अधिकारी डॉ.

छोटेलाल गुर्जर बतायो के जनवरी 2025 ऊं मार्च 2026 तांई ज़िला मांय खास अभियान रा तैत लिया ज्या 837 नमूनां मांय ऊं 223 तैय मानकां माथे खरा नी उतर्यां

000

सलूमबर रा पीएम श्री राजकीय उच्च माध्यमिक विद्यालय मांय विधायक शांता अमृत लाल मीणा आज संविधान कक्ष अर डिजिटल बाल पुस्तकालय जनता ने सूप्यां ई मौके विधायक विद्यार्थियां ऊं नुवा सुबीतां रो फायदो लेवण बाबत् कह्यो वे डी-एफ-एम-टी मद ऊं टीन शेड लगावण रा काम री सरुआत ई कीनीं

000

युवा कार्यक्रम अर खेल मंत्रालय गृह मंत्रालय सागे मिल र विकसित वाइब्रेंट ग्राम प्रोग्राम 2026 सारु माय भारत प्लेटफॉर्म माथे राष्ट्रीय स्तर री सवाल-जवाब री होड़ सरु कीनी हैं प्रश्नोत्तरी होड़ आवता महीना व्हेवण वाळा सीमावर्ती ग्राम सहभागिता कार्यक्रम मांय नौजवानां रा चयन कार्यक्रम रो पहलो दौर हैं ई ऑन लाइन होड़ मांय 20 मई तांई भाग लियो जा सके हैं

000

आईपीएल क्रिकेट मांय आज रॉयल चैलेंजर्स बेंगलुरु अर कोलकाता नाइट राइडर्स बीचे मुकाबलो व्हेलां ओ मैच अब ऊं थोड़ी देर पछे साढ़े सात बज्यां रायपुर मांय सरु व्हेलां अंक तालिका मांय फ़िलहाल कोलकाता नाइट राइडर्स आठवीं ठौड़ माथे है, जदके रॉयल चैलेंजर्स बेंगलुरु दूजा पायदान माथे हैं

000